

Ein wenig neu und anders als gewohnt

Üses Jahr heimer am Spiutag chönne afa. Mit de Velos simer du am Samsti Morge uf Busswil gfare u dert mit 7 Mannschafte im Ball über die Schnurr und eire Mannschaft im Volleyball gstartet. Es het sech wider einisch glohnt, im BÜS heimer einisch dr erst Platz und einisch dr zwöit Platz ghout. Ou üsi Grosse hei mit stouz dörfe d Siubermedaille im Volleyball entgäge näh. Bravo!

Am 6. Juni si mir när mit dere Mädelschaar uf Biel a Kids run. Ou das isch e coole Event wo d Kids fröid dran hei, ligt äüä o chlei dran dases für jede Platz e Medaille git;) schliesslech heisst a däm Alass üses Motto: Houptsach isch, wenn aui mitmache☺ ou das Jahr heimer wider e Rakete drbi gha und die isch „hurtig“ i ihrere Kategorie, ufe erst Platz gspeedet. Super gmacht Mia☺ mir si stouz u zwar uf aui.....

Quasi diräkt nachem Kids run isch z Jahr am 9. Bis am 11 Juni für d Oberstufe när ganz spezieu witer gange. Si hei z erste mau is Trainingslager uf Préles dörfe ga. Z Ganze Weekend isch d Gymnastik wo si am Jugitag vorgfuehrt hei im Vordergrund gstange. Es het sech zu 100 prozänt glohnt, si hei wäuts Vortschritte gmacht a däm weekend. Merci viu mau am Vorstang für die Chance und ou das mir wider dörfe ga, es het eifach gfägt u mir fröie üs uf das Jahr..... es riise Merci geit ou ad Kerstin für ihri unermüedlechi Ungerstützig.

Vorem Jugitag si das Jahr zersch d Summerferie cho u so hei mir i üsere letschte Stung vor dene Ferie mit dr Jugi zäme no mau Turnet und aschliessend wie au Jahr Bratwurst, Cervelat und Chips verdrückt.

Ändlech isch de när dä September cho u mir hei a Jugitag chönne ga. Das Jahr si mir nach paar Jahr wider mit dr Jugi zäme gstartet. Am Samsti heimer Einzuwettkampf gha, wo d Jael Oppliger Gold und d Mia Reber Siuber ghout hei, bi de Jungs hets o super Resultat gha, nähmlech dr Nicola Merino mit Gold dr Rayan Ingold und dr Neal McKeown mit Siuber und dr Valentin Tiefenbach mit Bronzé, starchi Leistig vo dene Kids, eifach nume super!!! Am Sunnti isch när dr Vereinswettkampf gsi und mir si ufem 4te undankbare Platz glandet, natürlech isch d Enttuschig gross gsi aber HEY! 4te Platz a somne Alass isch doch eigentlech geniau u si hei das aui super gmacht. So si mir erschöpf u zfride hei greist.

U scho wider hets gheisse, üebe, üebe, üebe, nähmlech für z Soirée. D Oberstufe het dörfe zeige was si uf de Rouschueh chöi ungerem Thema Star light Express und d Ungerstufe het sech am Thema Disneyland gwidmet. Danke ad Eutere voder Ungerstufe, für ihri Fantasie und Näikünst ade

Kostüm, die si dr Hammer gsi! O hie wider merci viu mau Kerstin fürs istudiere und üebe vo däm Nummer.

Z Jahr isch verbi u mir si stouz so e grossi u cooli Mädelsschaar dörfe z träniere u begleite.

Eui Leiterinne

Tanja Denise Carole und Anja